



Naqqiut

Siunnersuut 11 februar 2022-meersoq taarserpaa

Tunngavilersuutitaani ilanngunneqarpoq

“Nunatta Katersugaasivinit saaffiginninnermi paasinarsivoq angiususianik pisariaqartitsineq minnerpaamik 2000 m2 angissuseqartariaqartoq.”

Aamma

Pisortartani aningaasatigut allaffissornikkullu kingunerisassatigut taarsiutigineqarpoq “Sanaartugassap 2000 m2 missaani angissuseqarnissaa aallaavigineqarpoq. Sanaartugassaq allanik sanaartukkanik akisunerulaarnissaa ilimagisariaavoq, taamaammat pilersaarusionerq nappaanerlu 80.000.000 kr. uniorpallaassagunangilaa. Kvadrat meterimut 40.000 kr.-rnissaa aallaavigalugu. Tamanna aallaavigalugu ikinnerpaamik pilersaarusionermut 800.000 immikkoortinneqartariaqartut missingiunneqarpoq. Maannangaaq akivia ersarinnerusumik aaliangeruminaappoq, suliarinissaanut neqeroorusiortoqareerpat suliariumannittussarsiornerlu naammassereerpata paasineqassammat.”

7 marts 2022

UPA2022/96

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiuppara:

Nunatta Katersugaasiviata nukittorsarnissaa ullutsinnullu naleqquttumik toqqorsiveqalernissaq siunertaralugu, toqqorsivimmik sanaartornissamut pilersaarummik (projektering) aningaasaliinissamik. Pilersaarusiaq naammassereerluni inatsisartunut saqqummiunneqassaaq UKA 2023. Naalakkersuisut peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortaq Doris Jakobsen Jensen, Siumut)

Tunngavilersuut:

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiuppara:



Inatsisartut Kultooreqarnermut ataatsimiititaliaanni qinigaaffik kingulleq

Inatsisartuni siunnersuutigaa tunngavigalugu 19. oktober 2020 Nunatta

Katersugaasivia pularparput nuannerluinnartumik tamatsinnullu pissarsiffiulluurtumik.

Nunatta Katersugaasivianiippat nunatsinni katersugaaterpassuit eriagisariaqarlunnartut nunatta oqaluttuarisaaneranut kinaassusitsinnullu tunngaviliisut ukiorpassuarnilu sapinngisamik isumannaannerpaamillu innarlitsaalineqartariaqartut.

Ullumikkut Nunatta Katersugaasivia imatut inissisimavoq sissap killinnguaniippoq ullut ilaanni ulerujussuuartartumi mallertillugulu sissap killinganiikkami immamit seqqarsarneqartartumi. Taamatut inissisimanerata malitsigivaa Nunatta Katersugaasiviata aserfallakkiartornera aamma toqqortaatit eriagisariaqarlunnartut soorlu qalipagarsuit allallu katersugaatit itsarsuarmeersut sunnerneqarsinnaaneri isugutattumiittaramik naleqquttumik toqqorsiveqannginneq pissutaalluni. Ajornartorsiut alla tassaavoq Nunatta Katersugaasiviata katersugaatinik ulikkaarlunnarnera allanillu nunatsinnut angerlaanneqartariaqartunik periarfissaqannginnera. Nunatta Katersugaasiviani ima toqqorsivissaaleqineq annertutigaaq saqqummersitsivimmiittussaangikkaluit toqqorsivissaaleqineq tunngavigalugu saqqummersitsivimmiittariaqarlutik.

Nunatsinni katersugaatit eriagisariaqartut Københavnimi Naalagaaffiup katersugaasiviani toqqortarineqartut isumaqatigiissut "Utimit" tunngavigalugu 1982-imiit uterartinneqarnerat aallartippoq. Malitsigisaanik, Nunatta Katersugaasiviata Allagaateqarfialu pisattat 35.000 sinnerlugit 2001-ip tungaanut utertinnikuuaat taamaattorli pisattanik suli amerlasoorpassuarnik Danmarkimiittoqarpoq aammalu nunani allaniittoqarluni ass. timit paniinnarnikkut Peabodyp katersugaasivianiittut.

Timit paniinnarnikkut Uunartumeersut pillugit UKA2020 siunnersuuteqarpunga nunatsinnut angerlartinneqassasut ilisimavaralu katersugaasiviit sulineranni oqaloqatiginninneq 2019-imi Peabodyp Katersugaasivia, Nunatta Katersugaasivia aammalu Nunatta Allagaateqarfia tikeraarnikuusoq oqaloqatigiinnerlu aallarnisarlugu. Kisianni timit paniinnarnikkut toqqortarineqarnerinut assartorneqarnerinullu atatillugu aningaasatigut allaffissornikkullu kingunerisassai ullumikkut suli aporfiliisuupput, naak Uunartumi timit panernikut itsarsuarnitsat amiakkui pingaaruteqaraluaqisut aammalu nunatta oqaluttuarisaaneranut ilaallunnartut qanga pinngoqaarnitsinniit kulturitoqqamiillu oqaluttuuartuugaluurtut utertissinnaangilagut. Tunngaviuvoq Nunatta Katersugaasiviata naleqquttumik



toqqorsiveqannginnera malitsigisaanillu Københavnip Universitetiani
Retsmedicinsk Institutimit saqqummersitassatut toqqarneqarsimasut Panum
Institutimi ullumikkut toqqortarineqarneri. Inuiattut isummerfigisassaq pingaarutilik aamma tassaavoq
timit panernikut qanoq iliortassanerigut, toqqorsivinni toqqortaatigissanerigut imal. inissisimaffiini
eriagineqartassanersut? Inatsisartut UKA2020 imm. 114 aaliangiiffigineqarpoq

*Kalaallit timaasa paniinnarnikut Harvardip Universitetiani Peabodyp katersugaasivianiittut Kalaallit
Nunaannut utertitsinneqarnissaannut suliassamut pilersaarusiamik suliaqaqqullugit Naalackersuisut
peqquneqassasut. Suliassamut pilersaarut UKA2021-mut atatillugu kingusinnerpaamik Inatsisartunut
saqqummiunneqassaaq*

Suliassaq taanna Inatsisartuni akuersissutigineqartoq aprilimi qinersinerup kingorna Naalackersuisumik
siunersiuinermi apeqquteqaatigaara qanoq piniarneqarnerisq. Ulloq manna tikillugu iluamik
paasinngilara Naalackersuisooqatigiit unitsiinnarniarneraat imal. Naalackersuisortaap suliassaq
pingaarutilittut isigalugu suliaq nangeqqinniarneraa.

Nunatta oqaluttuarisaanerani katersugaatit eriagisariaqartut nunatta avataaniittut sulilu nunatsinni
katersorneqanngitsut amerlapput, assersuutitut taaneqaannarsinnaapput Gustav Holm-ip aammalu Knud
Rasmussen katersugarpassui maannakkut Danmarkimiitineqartut nunatsinni
toqqortaatigineqarsinnaanngimmata. Allat taaneqarsinnaasut tassaapput ullorissat anai, saanikorpasuit
ujarannguussimasut (fossil), atisat, sakkut allaallu dinosaurit saarngi nunatsinni nassaat maanna
Danmarkimiitsinneqartut imal. nunani allani. Tamakkorpasuit nammineq nunaqqatitsinni
innuttaasunut aammalu takornarianut takutitassiaralugit aningaasarsiutigisinnaagaluarpagut.

Taamaattumik suliassarput pingaarutilik tassaalerpoq Nunatta Katersugaasiviata nukittorsarnissaa
toqqorsiveqarnerullu tungaatigut annertusaanissaq. Toqqorsivik naammattoq ullutsinnullu naleqquttoq
pigilernissaa anguniarlugu toqqorsivimmik sanaartornissamut pilersaarummik (projektering)
aningaasaliinissamik Naalackersuisut peqquneqarnissaannik Inatsisartut aalajangiiffigisassaattut
siunnersuuteqarpunga, neriullunga ilassilluarneqassasoq.

Nunatta Katersugaasivinit saaffiginninnermi paasinarsivoq angiususianik pisariaqartitsineq
minnerpaamik 2000 m² angissuseqartariaqartoq.



Pisortanut aningaasatigut allaffissornikkullu kingunerisassat:

Sanaartugassap 2000 m² missaani angissuseqarnissaa aallaavigineqarpoq.

Sanaartugassaq allanik sanaartukkanik akisunerulaarnissaa ilimagisariaavoq, taamaammat pilersaarusionerq nappaanerlu 80.000.000 kr. uniorpallaassagunangilaa. Kvadrat meterimut 40.000 kr.-rnissaa aallaavigalugu. Tamanna aallaavigalugu ikinnerpaamik pilersaarusionerqmut 800.000 immikkoortinneqartariaqartutut missingiunneqarpoq. Maannangaaq akivia ersarinnerusumik aaliangeruminaappoq, suliarinissaanut neqeroorusiortoqareerpat suliariumannittussarsiornerlu naammassereerpata paasineqassammat.

Namminersorluni inuussutissarsiuteqarnermut aningaasatigut allaffissornikkullu kingunerisassat:

Soqanngilaq

Innuttaasunut aningaasatigut allaffissornikkullu kingunerisassat:

Soqanngilaq